

XI. Sćeńcojska wosada.

Do tuteje wosady słušeju wsy: Sćeńc (słyšach tam tež wurjekowanja Šćeńc, Čeńc, Ceńc, do Šćeńca; němski Steinitz), Giškojce (Geisendorf), Psowe Górkki (Klein-Görigk), Domašojce (Domsdorf), Radušc (Zwahr: Radušć, n. Rehnsdorf) a Třuskojce abo Střuskojce (Strausdorf).

Sćeńcojska wosada je z wjetšeho džěla hišće serbska, serbsku Božu službu pak ma jenož kóždu 3. njedźelu. Farař bydli w Drjewku, hdžež je so hač do 1798 za starych měšćanow a za serbsku čeledź kóždu njedźelu popođnju serbski přědowało.

Drjowk abo Drjewk (h.-serb. Drěwk, n. Drebkau, vulg. Drauke) sam je wot Němcow załožene městačko a ma wjele skótnych kupcow kaž Kulow. Hišće džensa je tam kaž před 100 lěty dosć serbskeje čeledže, kotrejž dyrbało so serbski přědować, a wulki džěl skótnych kupcow kaž tež hromadka druhich měšćanow móže serbski dla swojeho wužitka, su pak tež rodźeni Serbja mjez nimi, runjež z wjetša němscy rěča. Do Drjewka je zafarowana susodna wjeska Rakow, kotraž drje budže tohodla tež z wjetša zněmčena.

W šulach Sćeńcojskeje wosady so wot starych časow jenož němcuje. Wučer w Sćeńcu n. př. wukaza mi, jako so pola njeho za Serbowstwom wobhonjach: „Da müssen Sie nach Kausche (Chwóšcej) gehen, daß ist noch ein rechtes wendisches Loch!“ A tón běše rodźeny Serb.

W Sćeńcu móža wšitecy starši ludžo a wšitecy hospodarjo hišće serbski, wot džěci pak jenož hišće połojca, dokelž starši po wašnju we wonej cyłej stronje wužiwanym z džěćimi z džěla němski rěča po přiładze šulow, hdžež so Serbowstwo často wustorkuje a wusměšuje. Jedyn 40-lětny hospodař, z kotrymž rěčachmoj, derje serbski powědaše a čitaše a bě tež derje serbscy zmysleny. W Giškojcech su hišće wšitecy 150 wobydlerjo z wuwzaćom ryćefkublerja serbscy, wot 21 šulskich džěci powěda połojca hišće serbski, druha połojca pak z najmjeńša rozumi. Wjesny šořta, kiž mi to wukazowaše, bě Serb, ale wulki němcowař.

Podobno ma so ze Serbowstwom w Domašojcech a Ps. Górkach. W Górkach so na wsy hrajkace džěci serbski prašach a wone mi wjesele serbski wotmołwjachu. Wo Radušcu a Střuskojcech mam wot k. wuč. Nowotného nadrobne powěsće: Radušc ma 172 wob., 141 rodź. Serbow, 31 rodź. Němcow